

COMUNICATO n. 10 del 05/01/2024

Traduzione in mòcheno

Der Tonina en de Bur: “S ist bichte verstea’ abia as sai’ de spitelder van Trentin”

[Cimbri] “S sèll va hait bill sai’ an moment ver za verstea’ ont lissn. S ist bichte verstea’ abia as sai’ de spitelder van Trentin ont i pin gabiss as de enkern vourtschbinnen barn sai’ bichte ver miar ont s bart sai’ iberhaup an u’vong van a mitòrbet, bavai sèll as men tscherlt za tea’ abia politiker ist nèt ònderst va sèll as arauskimm van an òrbet an men mòcht zòmm. I so gèltsgott en enk as der sait kemmen ont i pitt enk za trong de mai’na padonken en òlla de òrbeter van spitel as pet de sai’na òrbet, pet gadult ont hèrz garantiert an guatn dinst ver de lait as kemmen as hearn se gabiss ben as de kemmen en spitel. Lai enk òndra mòcht s unterschit, abia as der hòt gamòcht bail en Covid pet de enker òrbet ont nou hait der gea’t envire za tea’. De inger Provinz hòt der zil za mòchen verstea’ bos as ist s vourstea’ ont s bèrt va de special Autonomie durch aa en kennen va de enker òrbet as a mitòrbet ist as garantiert an òllgamo’ bichtege dinst”. Asou der assessor en tschunthait Mario Tonina hòt klòfft en de òrbeter van San Lorenzo va de Bur bail en trèff gamòcht nomitto van eirta as de 12 van schantònderer pfiart van generalviarer va de provinzal bèrk ver de tschunthaitn dinstn Antonio Ferro ont pet de viarer van integrazione social ont tschunthait Elena Bravi.

Benn as de sai’ kemmen s hòt gòp de viareren van spitel Silvia Atti, der coordinator van infermiarn va de direzion van dektern Enrico Lenzi, de viareren van organisation va de Bur de Claudia Benedetti, der viarer van distretto Est Enrico Nava ont der viarer va de amministrativ òrbet van distretto der Armando Toniolatti, zòmm pet de viarern va de Unità va òrbet ont en de coordinatoren zòmm pet de òndern vourstea’ner van professionistn as van spitel ont van distretto Est sai’. No en trèff ka de sol van trèffn, bou as ist kemmen vourstellt en gònzn der spitel ont de dinstn as en lònt, s hom klòfft de operatorn, der assessor hòt tschauk de struktur bou as sai’ noch za mòchen richtnòrbetn ver za verpersern ont greaser ausrichtn ver 3.800 viareket metre va mearer plòtz.

“De bichtegen austrichtnòrbetn va de doi zait gea’ no en rif van an polizentregen spitel: de doi struktur bart an “switch” ver Trea’t ont Rovereto aa sai’, benn as de òrbetn van zboa spitelder u’vongen barn. De inser medizinschual bart de earste en Balschlont sai’ as nèt an sitz aloa’ hom bart, ober mearer en lònt, asou as òlla de spitelder toalnemmen barn ont de professionistn barn de referentn sai’ ver de jungen dekter ont de spezialisiarendn”, hòt tsòk Ferro, ont der hòt unterstrichen as schoa’ iaz bolten spezialisiarendn òrbetn kan spitel va de Bur, as unter sai’na stòrchen pinkt de diabetologi hòt.

Òndra bichtegen elementn va de struktur, asou abia as de viareren Atti gadenkt hòt, sai’ de maulchirurgi ver lait as nèt aloa’ veche sai’ ont de odontoiatri, s autea’ van nefrologesn krònkendinst pet òrbeter as lòk de dialisi mòchen en de turismuszaitn ver bem as en Trentin urlaub mòcht. Abia as gedenkt kemmen ist, en leiste jor ist augatu’ kemmen an krònkendinst va endocrinologi ont s ist no za kemmen paut an nain zentrum ver kopfbeateger as pet madesi’n nèt verpai gea’, pet en rif za kemmen an hub ver de doi krònket. Dernem

en de doin òrbetn vinnt men de prossimitetmedizin, der onkologesn day hospital ver de chemioterapian ont de unitet ver de beategerterapi, ont nou de zòmmòrbet pet Villa Rosa va Persn. Zbischn de problem as unterstrichen kemmen sai', ist as bea'ne u'stelltn hòt ont der tema va de attraktivitet ont va abia za hòlten de lait.

S spitol San Lorenzo hòt en gònzn 97 pettplatz ont en 2022 der hòt gahòp 2843 spitolisierungen ont 1729 chirurgisn òrbetn, ont de zeiln van 2023 sai' heacher (hait sai'sa 2005 de òrbetn). Kan earstenoatdinst sai' gòngen 12433 lait, ont bichte sai' de zeiln va de Operativunitet va radiologi, as en 2023 hòt finz iaz 24904 òrbetn gamòcht. De lònt assistenz Valzegu'-Primiero enteressiart 92000 lait ont zbischn de dinst as de gem s gip an projekt as runt nai ist ont as hoast "Aree interne Tesino". Der projekt kimp araush van a zòmmòrbet zbischn Provinz, Tsunthaitbèrk ont FBK, ont de tschbinnt vour za prauchen digitalplinder ver en telekontroll en de vòlln va ringa hèrzkronketn ont der ist va kurz gabaitert kemmen en de diabetologi, asou as der kronket nèt òlbe en de tsunthaitstrukturn gea' miast, ont asou der kimp dena tschaut van dekter.

Ibersetz gamòcht van Sprochtirl va de Tolgamoas'schòft Hoa Valzegu' ont Bersntol

Letrattdinst ont film gamòcht van Druckomt

Download van pilder do: <https://bit.ly/3v2Hgbc>

https://www.youtube.com/watch?v=TKtvmADH4_4&t=8s

<https://www.youtube.com/watch?v=ILc5xyl2Kco>

https://www.youtube.com/watch?v=BCQF_KLdMLA&t=1s

(cdt)